





古樂苑卷第二十七

西吳 梅鼎祚 補正

東越 呂胤昌 校閱

舞曲歌辭

通典曰樂之在耳者曰聲在目者曰容聲應乎耳
可以聽知容藏於心難以貌觀故聖人假于戚羽
旄以表其容發揚蹈厲以見其意聲容選和而後
大樂備矣詩序曰詠歌之不足不知手之舞之足
之蹈之然樂心內發感物而動不覺手之自運歡
之至也此舞之所由起也舞亦謂之萬禮記外傳
曰武王以萬人同滅商故謂舞爲萬商頌曰萬舞
有奕則殷已謂之萬矣魯頌曰萬舞洋洋衛詩曰
公庭萬舞然則萬亦舞之名也春秋魯隱公五年
考仲子之宮將萬焉因問羽數於衆仲衆仲對曰
天子用八諸侯六大夫四士二舞所以節八音而
行八風故自八而下於是初獻六羽始用六佾也



杜預以爲六六三十六人而沈約非之曰八音克
諸然後成樂故必以八人爲列自天子至士降殺
以兩兩者減其二列爾預以爲一列又減二人至
士止餘四人豈復成樂服虔謂天子八八諸侯六
八大夫四八士二八於義爲允也周有六舞一曰
帗舞二曰羽舞三曰皇舞四曰旄舞五曰干舞六
曰人舞帗舞者析羽也皇舞者雜五綵繒若漢靈星舞子所持是
也羽舞者析羽也皇舞者雜五綵羽如鳳皇色持
之以舞也旄舞者麾牛之尾也干舞者兵舞持盾
而舞也人舞者無所執以手袖爲威儀也周官舞
師掌教兵舞帥而舞山川之祭祀教帗舞帥而舞
社稷之祭祀教羽舞帥而舞四方之祭祀教皇舞
帥而舞旱暵之事樂師亦掌教國子小舞自漢以
後樂舞寢盛故有雅舞有雜舞雅舞用之郊廟朝
饗雜舞用之宴會晉傅玄又有十餘小曲名爲舞
曲故南齊書載其辭云獲罪於天北徙朔方墳墓
誰掃超若流光疑非宴樂之辭未詳其所用也前
世樂飲酒酣必自起舞詩云屢舞仙仙是也故知
宴樂必舞但不宜屢爾譏在屢舞不譏舞也漢武
帝樂飲長沙定王起舞是也自是已後尤重以舞

相屬所屬者代起舞猶世飲酒以杯相屬也灌夫
起舞以屬田蚡晉謝安舞以屬桓嗣是也近世以
來此風絕矣

雅舞

雅舞者郊廟朝饗所奏文武二舞是也古之王
者樂有先後以揖讓得天下則先奏文舞以征
伐得天下則先奏武舞各尚其德也黃帝之雲
門堯之大咸舜之大韶禹之大夏文舞也殷之
大濩周之大武武舞也周存六代之樂至秦唯
餘韶武漢魏已後咸有改革然其所用文武二
舞而已名雖不同不變其舞故古今樂錄曰自
周以來唯改其辭示不相襲未有變其舞者也
然自雲門而下皆有其名而亡其容獨大武之
制存而可考樂記曰樂者象成者也摠干而山
立武王之事也發揚蹈厲太公之志也武亂皆
坐周召之治也武始而北出再成而滅商三成
而南四成而南國是疆五成而分周公左召公
右六成復綴以崇天子夾振之而四代盛威於

中國也分夾而進事蚤濟也久立於綴以待諸
侯之至也故季札觀樂見舞象箏南籥者曰美
哉猶有憾見舞大舞者曰美哉周之盛也其若
此乎其後成王以周公爲有勳勞命魯公世世
祀周公以天子禮樂升歌清廟下管象武朱干
玉戚冕而舞大武皮弁素幘裼而舞大夏以廣
魯於天下也自漢已後又有廟
舞各用於其廟凡此皆雅舞也

後漢武德舞歌詩

一曰世祖廟登歌宋書樂志曰周存六代之
樂至秦唯餘韶武而已始皇二十六年改周
大武舞曰五行漢高祖四年造武德舞人悉
執干戚以象天下樂已行武以除亂也六年
改舜韶舞曰文始以示不相襲也文帝又造
四時舞以明天下之安和蓋樂先王之樂者
明有法也樂已所自作者明有制也孝景採
武德舞作昭德舞薦之太宗之廟孝宣採昭
德舞爲盛德舞薦之世宗之廟漢書樂志曰
高廟奏武德文始五行之舞孝文廟奏昭德

文始四時五行之舞孝武廟奏盛德文始四
時五行之舞諸帝廟皆常奏文始四時五行
舞大抵皆因秦舊事焉東觀漢記曰明帝永
平三年八月公卿奏世祖廟舞名東平王蒼
議以爲漢制宗廟各奏其樂不皆相襲以明
功德光武皇帝撥亂中興武功盛大廟樂舞
宜曰大武之舞其文始五行之舞如故勿進
武德舞詔曰如驃騎將軍議進武德之舞如
故

武德舞歌詩

東平王蒼

於穆世廟肅雍顯清俊翼翼秉文之成越序上帝駿
奔來寧建立三雍封禪泰山章明圖讖放唐之文休矣
惟德罔射協同本支百世永保厥功

晉正德大豫舞歌

宋書樂志曰晉武帝泰始九年荀勗典知樂事使郭瓊宋識等造正德大豫之舞而勗及傅玄張華又各造舞歌咸寧元年詔定祖宗之號而廟樂同用正德大豫舞初魏明帝景初元年造武始咸熙二舞祀郊廟武始舞者平冕黑介幘玄衣裳白領袖絳領袖中衣絳合幅袴絳絳黑韋鞮咸熙舞者冠委貌其餘服如前奏於朝廷則武始舞者武冠赤介幘生絳袍單衣絳領袖皂領袖中衣虎文畫合幅袴白布絳黑韋鞮咸熙舞者進賢冠黑介幘生黃袍單衣白合幅袴其餘服如前晉相承用之

正德舞歌

傅玄

下同

天命有晉光濟萬國穆穆聖皇文武惟則在天斯正在地成德載韜政刑載崇禮教我敷玄化臻於中道

大豫舞歌

於鑠皇晉配天受命。熙帝之光。世德惟聖。嘉樂大豫。保
佑萬姓。淵兮不竭。沖而用之。先天弗違。虔奉天時。

正德舞歌

荀勗下同

人文垂則。盛德有容。聲以依詠。舞以象功。干戚發揮。節
以笙鏞。羽籥雲會。翊宣令蹤。敷美盡善。允協時邕。煥炳
其章。光乎萬邦。萬邦洋洋。承我晉道。配天作享。元命有
造。上化如風。民應如草。穆穆斌斌。形于綴兆。文武旁作。
慶流四表。無競維烈。永世是紹。

大豫舞歌

豫順以動。大哉惟時。時邁其仁。世載邕熙。兆我區夏。宣

文是基大業惟新我皇隆之重光累曜欽明文思迄用
有成惟晉之祺穆穆聖皇受命既固品物咸寧芳烈雲
布文教旁通篤以淳素玄化洽暢被之暇豫作樂崇德
同美韶濩濔邈幽遐式遵王度

傳荀辭
載宋書

正德舞歌

晉書樂志曰泰始九年光祿大夫荀勗以杜夔所制律呂校太樂總

章鼓吹八音與律呂乖錯乃制古尺作新律呂以調聲韻律成遂班下太常使大樂總章鼓吹清商施用勗遂典知樂事啓朝士解音律者共掌之使郭夏宋識等造正德大豫二舞其樂章亦張華之所作云

張華

下同

曰皇上天玄鑒惟光神器周回五德代章祚命于晉世
有哲王弘濟區夏陶甄萬方大明垂耀旁燭無疆蚩蚩

庶類風德永康皇道惟清禮樂斯經金石在縣萬舞在
庭象容表慶協律被聲軼武超濩取節六韻同進退讓
化漸無形大和宣洽通于幽冥

大豫舞歌

惟天之命符運有歸赫赫大晉三后重暉繼明紹世光
撫九圍我皇紹期遂在璇璣羣生屬命奄有庶邦慎徽
五典玄教遐通萬方同軌率土咸雍爰制大豫宣德舞
功醇化旣穆王道協隆仁及草木惠加昆蟲億兆夷人
悅仰皇風丕顯大業永世彌崇

宋前後舞歌

宋書樂志曰武帝永初元年改晉正德舞曰前舞大豫舞曰後舞並糴賓廂作孝武孝建二年九月建平王宏議以爲祖有功而宗有德故漢高祖廟樂稱武德太宗廟樂曰昭德魏制武始舞武廟制咸熙舞文廟則祖宗之廟別有樂名晉氏之樂正德大豫及宋不更名直爲前後二舞依據昔代議外事乖宜釐改權稱以凱容爲韶舞宣烈爲武舞祖宗廟樂摠以德爲名若廟非不毀則樂舞別稱猶漢高文武咸有嘉號惠景二主樂無餘名章皇太后廟唯奏文樂明婦人無武事也郊祀之樂無復別名仍同宗廟而已詔如宏議古今樂錄曰宋孝武改前舞爲凱容之舞後舞爲宣烈之舞

前舞歌

王韶之

下同

於赫景明天監是臨樂來伊陽禮作惟陰歌自德富儷
由功深庭列宮縣陞羅瑟琴翻籥繁會笙磬諧音簫韶

雖古九成在今道志和聲德音孔宣光我帝基協靈配
乾儀行六合化穆自然如彼雲漢爲章于天熙熙萬類
陶和當年擊轅中韶永世弗騫

後舞歌

假樂聖后寔天誕德積美自中王猷四塞龍飛在天儀
刑萬國欽明惟神臨朝淵默不言之化品物咸德告成
于天銘勲是勒翼翼厥猷娓娓其仁順命勅制因定和
神海外有截九圍無塵冕旒司契垂拱臨民乃舞大豫
欽若天人純嘏孔休萬載彌新

娓娓一作
作賡賡

齊前後舞歌

前舞階步歌

隋書樂志曰近代舞出入皆作樂謂之階步咸用肆夏至梁去

之隋復用焉卽周官所謂樂出入奏鐘鼓也古今樂錄曰何承天云今舞出樂謂之階步魏賓廂作尋儀禮宴飲射三樂皆云席工於西階上大師升自西階北面東上相者坐受瑟乃降笙入立于縣中北面乃合樂工歌鹿鳴四牡周南今直謂之階步而承天又以爲出樂俱失之矣

齊辭

天挺聖哲三方維綱川嶽伊寧七耀重光
茂育萬物衆庶咸康道用潛通仁施遐揚
德厚必極功高昊蒼舞象盛容德以歌章
八音既節龍躍鳳翔皇基永樹二儀等長

前舞凱容歌

南齊書樂志曰宋前後舞歌二章齊微改革多仍舊辭宣烈舞

執干戚用魏武始舞冠服凱容舞執羽籥
用魏咸熙舞冠服宋以凱容繼韶爲文舞
據韶爲言宣烈卽是古之大武今世諺呼
爲武王伐紂齊初仍舊不改宋舞名其舞
人冠服亦相承用之古今樂錄曰宋孝武
改前舞爲凱容之舞後舞爲宣烈之舞何
承天三代樂序云晉正德大豫舞蓋出於
漢昭容禮容樂然則其聲節有古之遺音
焉晉使郭瓊宋識等造正德大豫舞初不
言因革昭業等兩舞承天空謂二容竟自
無據按正德大豫二舞卽出宣武宣文魏
大武三舞也宣武魏昭武舞也宣文魏武
始舞也魏改巴渝爲昭武五行曰大武今
凱容舞執籥秉翟卽魏武始舞也宣烈舞
有矛弩有干戚矛弩漢巴渝舞也干戚周
武舞也宋世止革其辭與名不變其舞舞
相傳習至今不改瓊識所造正是雜用二
舞以爲大豫爾夷蠻之樂雖陳宗廟不應
雜以周

宋辭

舞也

於赫景命天鑒是臨樂來伊陽禮作惟陰歌自德富舞
由功深庭列宮縣陞羅瑟琴詠籥繁會笙磬諧音簫韶
雖古九奏在今導志和聲德音孔宣光我帝基協靈配
乾儀刑六合化穆自宣如彼雲漢爲章于天熙熙萬類
陶和當年擊轅中韶永世弗騫

後舞階步歌

齊辭

皇皇我后紹業盛明滌拂除穢宇宙載清允執中和以
蒞蒼生玄化遠被兆世軌形何以崇德乃作九成妍步
恂恂雅曲芬馨八風清鼓應以祥禎澤浩天下功齊百
靈

後舞凱容歌

宋辭

假樂聖后寔天誕德積美自中王猷四塞龍飛在天儀
刑萬國欽明惟神臨朝淵默不言之化品物咸得告成
千天銘勳是勒翼翼厥猷豐豐其仁從命創制因定和
神海外有截九國無塵冕旒司契垂拱臨民乃舞凱容
欽若天人純嘏孔休萬載彌新

梁大壯大觀舞歌

二首

隋書樂志曰梁初猶用凱容宣烈之舞武帝
定樂以武舞爲大壯舞文舞爲大觀舞又曰
大壯舞奏夷則大觀舞奏姑洗取其月王也
三郊明堂太廟三朝同用古今樂錄曰梁改
宣烈爲大壯卽周武舞也改凱容爲大觀卽
舜韶舞也陳以凱容樂舞用之郊廟而大壯

大觀猶同梁舞所謂祠用宋曲
宴準梁樂蓋取人神不雜也
沈約

大壯舞歌

隋書樂志曰大壯舞取易象云大壯大者壯也正大而天地之情可

見也古今樂錄曰大壯大觀二舞以大爲名老子云域中有四大論語云惟天爲大今制大壯大觀之名亦因斯而立義焉

高高在上實愛斯人眷求聖德大拯羣倫率土方燎如火在薪懞懞黔首暮不及晨朱光啓耀兆發穹旻我皇鬱起龍躍漢津言屆牧野電激雷震闕輦之甲彭濮之人或貌或虎漂杵浮輪我邦雖舊其命惟新六伐乃止七德必陳君臨萬國遂撫八寅

一曲四言
虎隋書作武

大觀舞歌

隋書樂志曰大觀舞取易象曰大觀在上觀天之神道而四時不忒

也

皇矣帝烈大哉興聖奄有四方受天明命居上不怠臨
下惟敬舉無訾則動無失正物從其本人遂其性昭播
九功肅齊八柄寬以惠下德以爲政三趾晨儀重輪夕
映棧壑忘阻梯山匪負如日有恒與天無竟載陳金石
式流舞詠咸英韶夏於茲比盛

一曲四言

北齊文武舞歌

隋書樂志曰北齊元會大饗奏文武二舞將
作並先設階步馬馮惟納云文武樂章詩彙
云祖珽作按隋書樂志祖珽上書論樂於文
宣之時至武成時始定四郊宗廟三朝之樂
而不著作歌之人則非珽作
明矣今考北史陸卬等製

陸卬等製

文舞階步辭

我后降德肇峻皇基搖鈴大號振鐸命期雲行雨洽天
臨地持茫茫區宇萬代一時文來武肅成定於茲象容
則舞歌德言詩鏘鏘金石列列匏絲鳳儀龍至樂我雍
熙

文舞辭

皇天有命歸我大齊受茲華玉爰錫玄珪奄家環海實
子蒸黎圖開寶匣檢封芝泥無思不順自東徂西教南
暨朔罔敢或攜比日之明如天之大神化之洽率土無
外眇眇舟車華戎畢會祠我春秋服我冠帶儀協震象

樂均天籟蹈武在庭其容藹藹

武舞階步辭

大齊統曆天鑒孔昭金人降汎火鳳來巢眇均虞德干
戚降苗夙沙攻主歸我軒朝禮符揖讓樂契咸韶蹈揚
惟序律度時調

武舞辭

天眷橫流宅心玄聖祖功宗德重光襲映我皇恭已誕
膺靈命宇外斯燭域中咸鏡悠悠率土時惟保定微微
動植莫違其性仁豐庶物施洽羣生海寧洛變契此休
明雅宣茂烈頌紀英聲鏗鎗鐘鼓掩抑簫笙歌之不足

舞以禮成鑠矣王度緬邁千齡

隋文武舞歌

隋書樂志曰隋有文舞武舞舞各六十四人
文舞黑介幘冠進賢冠絳紗連裳內單皁襪
領襪裙革帶烏皮履左手執籥右手執翟武
舞服武弁朱襦衣餘同文舞左執朱干右執
大戚其舞六成始而受命再成而定山東三
成而平蜀道四成而北狄是通五成而江南
是拓六成復綴以闡太平

文舞歌

天睠有屬后德惟明君臨萬寓昭事百靈濯以江漢樹
之風聲罄地畢歸窮天皆至六戎仰朔八蠻請吏煙雲
獻彩龜龍表異緝和禮樂燮理陰陽功由舞見德以歌

彰兩儀同大日月齊光

畢一作必
一作行

武舞歌

惟皇御寓惟帝乘乾五材並用七德兼宣平暴夷險拯
溺救燔九域載安兆庶斯賴續地之厚補天之大聲隆
有截化覃無外鼓鐘既奮干戚攸陳功高德重政謚化
淳鴻休永播久而彌新

古樂苑卷第二十七

終

古樂苑卷第二十八

西吳 梅鼎祚 補正

東越 呂胤昌 校閱

舞曲歌辭 雜舞

雜舞

雜舞者公莫巴渝繁舞鞞舞鐸舞拂舞白紵之類是也始皆出自方俗後寢陳於殿庭蓋自周有縵樂散樂秦漢因之增廣宴會所奏率非雅舞漢魏已後並以鞞鐸巾拂四舞用之宴饗宋武帝大明中亦以鞞拂雜舞合之鍾石施於廟庭朝會用樂則兼奏之明帝時又有西僖羌胡雜舞後魏北齊亦皆參以胡戎伎自此諸舞彌盛矣隋牛弘亦請存四舞宴會則與雜伎同設於西涼前奏之而去其所持鞞拂等按此雖非正樂亦皆前代舊聲故成公綏賦云鞞鐸舞庭

八音並陳梁武帝報沈約云
鞞鐸巾拂古之遺風是也

魏俞兒舞歌

王粲

晉書樂志曰巴渝舞漢高帝所作也高帝自
蜀漢將定三秦閬中范因率賓人從帝爲前
鋒號板楯蠻勇而善鬪及定秦中封因爲閬
中侯復賓人七姓其俗喜歌舞高帝樂其猛
銳數觀其舞曰武王伐紂歌也後使樂人習
之閬中有渝水因其所居故曰巴渝舞舞曲
有矛渝弩渝安臺行辭本歌曲四篇其辭既
古莫能曉其句度左思蜀都賦云奮之則賓
旅玩之則渝舞也顏師古曰巴巴人也俞俞
人也高祖初爲漢王得巴俞人並趨捷與之
滅楚因存其武樂巴俞之樂自此始也巴即
今之巴州渝卽今之渝州名各本其地宋書
樂志曰魏俞兒舞歌四篇魏國初建所用使
王粲改創其辭爲矛渝弩渝安臺行辭新福
歌曲行辭以述魏德後於太祖廟並作之黃
初二年改曰昭武舞及晉又改曰宣武舞唐

書樂志曰俞美也魏晉改其名梁復號巴渝隋文帝以非正典罷之

漢初建國家匡九州蠻荆震服五刃三革休安不忘備
武樂脩宴我賓師敬用御天永樂無憂子孫受百福常
與松喬遊丞庶德莫不咸歡柔

右矛俞新福歌

材官選士劒弩錯陳應桴蹈節俯仰若神綏我武烈篤
我淳仁自東自西莫不來賓

右弩俞新福歌

我功既定庶士咸綏樂陳我廣庭式宴賓與師昭文德
宣武威平九有撫民黎荷天寵延壽尸千載莫我違

我功

武功一作

右安臺新福歌

神武用師士素厲仁恩廣覆猛節橫逝自古立功莫我弘大栢栢征四國爰及海裔漢國保長慶垂祚延萬世

右行辭新福歌

晉宣武舞歌

傅玄

晉書樂志曰魏黃初三年改漢巴渝舞曰昭武舞景初元年又作武始咸熙章斌三舞皆執羽籥及晉改昭武舞曰宣武舞羽籥舞曰宣文舞咸寧元年詔廟樂停宣武宣文二舞而公用正德大豫舞云

惟聖皇篇

矛俞第一

惟聖皇德巍巍光四海禮樂猶形影文武爲表裏乃作
巴渝肆舞士劒弩齊列戈矛爲之始進退疾鷹鷂龍戰
而豹起如亂不可亂動作順其理離合有統紀

短兵篇

劒俞第二

劒爲短兵其勢險危疾踰飛電回旋應規武節齊聲或
合或離電發星驚若景若差兵法攸象軍容是儀

軍鎮篇

弩俞第三

弩爲遠兵軍之鎮其發有機體難動往必速重而不遲
銳精分鏑射遠中微弩俞之樂一何奇變多姿退若激
進若飛五聲協八音諧宣武象讚天威

窮武篇

安臺行亂第四

窮武者喪何但敗北柔弱亡戰國家亦廢秦始徐偃旣
已作戒前世先王鑒其機脩文整武藝文武足相濟然
後德光大亂曰高則亢滿則盈亢必危盈必傾去危傾
守以平沖則久濁能清混文武順天經

晉宣文舞歌

傅玄

羽籥舞歌

羲皇之初天地開元罔罟禽獸羣黎以安神農教耕創
業誠難民得粒食澹然無所患黃帝始征伐萬品造其
端軍駕無常居是曰軒轅軒轅旣勤止堯舜匪荒寧夏

禹治水湯武又用兵孰能保安逸坐致太平聖皇邁乾
乾天下興頌聲穆穆且明明惟聖皇道化彰激四海清
三光萬幾理庶事康潛龍升儀鳳翔風雨時物繁昌却
走馬降瑞祥揚側陋簡忠良百祿是荷眉壽無疆

羽鐸舞歌

昔在渾成時兩儀尚未分陽升垂清景陰降興浮雲中
和合氤氲萬物各異羣人倫得其序衆生樂聖君三統
繼五行然後有質文皇王殊運代治亂亦繽紛伊大晉
德兼往古越犧農邈舜禹參天地陵三五禮唐周樂韶
武豈惟簫韶六代具舉澤霑地境化充天寓聖明臨朝

樂府 卷二十八
元凱作輔晉天同樂胥浩浩元氣遐哉太清五行流邁
日月代征隨時變化庶物乃成聖皇繼天光濟羣生化
之以道萬國咸寧受茲介福延于億齡

鞞舞歌

宋書樂志曰鞞舞未詳所起然漢代已施於燕
享矣傅毅張衡所賦皆其事也魏曹植改作新
歌五篇晉鞞舞歌亦五篇並陳於元會鞞舞故
二八桓玄將卽真太樂遣衆伎表明子啓增滿
八佾相承不復革宋明帝自改舞曲歌辭并詔
近臣虞繡並作古今樂錄曰鞞舞梁謂之鞞扇
舞卽巴渝是也鞞扇器名也鞞扇上舞作巴渝
弄至鞞舞竟豈非巴渝一舞二名何異公莫亦
名巾舞也漢曲五篇一曰關東有賢女二曰章
和二年中三曰樂久長四曰四方皇五曰殿前
生桂樹並章帝造魏曲五篇一明明魏皇帝二
大和有聖帝三魏歷長四天生烝民五爲君旣

不易並明帝造以代漢曲其辭並亾陳思王又有五篇一聖皇篇以當章和二年中二靈芝篇以當殿前生桂樹三大魏篇以當漢吉昌四精微篇以當關中有賢女五孟冬篇以當狡兔按漢曲無漢吉昌狡兔二篇疑樂久長四方皇是也隋書樂志曰鞞舞漢巴渝舞也按樂錄隋志並以鞞舞爲巴渝今考漢魏二篇歌辭各異本不相亂蓋因梁陳之世於鞞舞前作巴渝弄遂云一舞二名殊不知二舞亦容合作猶巾舞以白紵送豈得便謂白紵爲巾舞邪失之遠矣

魏鞞舞歌

序曰漢靈帝西園鼓吹有李堅者能鞞舞遭亂西隨段熲先帝聞其舊有技召之堅旣中廢兼古曲多謬誤故改作新歌五篇

陳思王植

聖皇篇

聖皇應曆數正康帝道休九州咸賓服威德洞八幽三

公奏諸公不得久淹畱蕃位任至重舊章咸率由侍臣
省文奏陛下體仁慈沈吟有愛戀不忍聽可之迫有官
典憲不得顧恩私諸王當就國璽綬何纍綫便時舍外
殿宮省寂無人主上增顧念皇母懷苦辛何以爲贈賜
傾府竭寶珍文錢百億萬采帛若煙雲乘輿服御物錦
羅與金銀龍旂垂九旒羽蓋參班輪諸王自計念無功
荷厚德思一効筋力糜軀以報國鴻臚擁節衛副使隨
經營賁戚並出送夾道交輜輶車服齊整設韓曄耀天
精武騎衛前後鼓吹簫笳聲祖道魏東門淚下霑冠纓
扳蓋因內顧俛仰慕同行行將日暮何時還闕庭車

輪爲裴徊四馬躊躇鳴路人尚酸鼻何況骨肉情

馬系一作藁

靈芝篇

靈芝生王地朱草被洛濱榮華相晃耀光采曄若神古
時有虞舜父母頑且嚚盡孝於田壠烝烝不違仁伯瑜
年七十綵衣以娛親慈母笞不痛歔歔涕霑巾丁蘭少
失母自傷早孤煢刻木當嚴親朝夕致三牲暴子見陵
侮犯罪以亾形丈人爲泣血免戾全其名董永遭家貧
父老財無遺舉假以供養傭作致甘肥責家填門至不
知何用歸天靈感至德神女爲秉機歲月不安居嗚呼
我皇考生我旣已晚棄我何其早蓼莪誰所興念之令

人老退詠南風詩。灑淚滿禕袍。亂曰聖皇君四海。德教朝夕宣。萬國咸禮讓。百姓家肅虔。庠序不失儀。孝悌處中田。戶有曾閔子。比屋皆仁賢。髻鬣無天齒。黃髮盡其年。陛下三萬歲。慈母亦復然。

大魏篇

大魏應靈符。天祿方甫始。聖德致泰和。神明爲驅使。左右宜供養。中殿宜皇子。陛下長壽考。羣臣拜賀咸悅喜。積善有餘慶。寵祿固天常。衆喜填門至。臣子蒙福祥。無患及陽遂。輔翼我聖皇。衆吉咸集會。兇邪姦惡竝滅亡。黃鵠遊殿前。神鼎周西阿。玉馬克乘輿。芝蓋樹九華。白

虎戲西除含利從辟邪騏驎躡足舞鳳皇拊翼歌豐年
大置酒玉樽列廣庭樂飲過三爵朱顏暴已形式宴不
違禮君臣歌鹿鳴樂人舞鼙鼓百官雷抃讚若驚儲禮
如江海積善若陵山皇嗣繁且熾孫子列曾玄羣臣咸
稱萬歲陛下長壽樂年御酒停未飲賢戚跪東廂侍人
承顏色奉進金玉觴此酒亦真酒福祿當聖皇陛下臨
軒咲左右咸歡康杯來一何遲羣僚以次行賞賜累千
億百官並富昌

寵宋書
作榮

精微篇

精微爛金石至心動神明杞妻哭死夫梁山爲之傾子

丹西質秦烏白馬角生鄒衍囚燕市繁霜爲夏零關東
有賢女自字蘇來卿壯年報父讐身沒垂功名女休逢
赦書白刃幾在頸俱上列仙籍去死獨就生太倉令有
罪遠徵當就拘自悲居無男禍至無與俱緹縈痛父言
荷擔西上書盤桓北闕下泣淚何漣如乞得并姊弟沒
身贖父軀漢文感其義肉刑法用除其父得以免辯義
在列圖多男亦何爲一女足成居簡子南渡河津吏廢
舟船執法將加刑女娟擁權前女父聞君來將涉不測
淵畏懼風波起禱祝祭名川備禮饗神祇爲君求福先
不勝醑祀誠至令犯罰艱君必欲加誅乞使知罪僭妄

願以身代至誠感蒼天國君高其義其父用赦原河激
奏中流簡子知其賢歸聘爲夫人榮寵超後先辯女解
父命何況健少年黃初發和氣明堂德教施治道致太
平禮樂風俗移刑錯民無枉怨女復何爲聖皇長壽考
景福常來儀

孟冬篇

孟冬十月陰氣厲清武官誠田講旅統兵元龜襲吉元
光著明蚩尤蹕路風弭雨停乘輿啓行鸞鳴幽軋虎賁
采騎飛象珥鵀鐘鼓鏗鏘簫管嘈唱萬騎齊鑣千乘等
蓋夷山填谷平林滌藪張羅萬里盡其飛走趯趯狡兔

揚白跳翰獵以青骹掩以脩竿韓盧宋鵠呈才騁足噬
不盡縹牽麋掎鹿魏氏發機養基撫弦都盧尋高搜索
猴猿慶忌孟賁蹈谷超巒張目決背髮怒穿冠頓熊扼
虎蹴豹搏羆氣有餘勢負象而趨獲車旣盈日側樂終
罷役解徒大饗離宮亂曰聖皇臨飛軒論功校獵徒死
禽積如京流血成溝渠明詔大勞賜大官供有無走馬
行酒醴驅車布肉魚鳴鼓舉觴爵擊鍾醕無餘絕綱縱
麟麋弛罩出鳳雛收功在羽校威靈震鬼區陛下長懽
樂永世合天符

較手鐘醕無餘宋書作鐘
擊手位無餘綱一作網

晉輦舞歌

古今樂錄曰晉鞞舞歌五篇一曰洪業篇當
魏曲明明魏皇帝古曲關東有賢女二曰天
命篇當魏曲大和有聖帝古曲章和二年中
三曰景皇篇當魏曲魏曆長古曲樂久長四
曰大晉篇當魏曲天生丞民古曲四方皇五
曰明君篇當魏曲爲君旣不易古曲殿前生
桂樹按曹植怨歌行云爲君旣不
易爲臣良獨難不知與此同否

傅玄

洪業篇

詩紀云晉宋書樂志載此五詩俱不
言是傅玄樂府作玄詩或別有考

宣文勗洪業盛德在泰始聖皇應靈符受命君四海萬
國何所樂上有明天子唐堯禪帝位虞舜惟恭已恭已
正南面道化與時移大赦濫萌漸文教被黃支象天則
地體無爲聰明配日月神聖參兩儀雖有三凶類靜言

無所施象天則地體無爲稷契並佐命伊呂升王臣蘭
芷登朝肆下無失宿民聲發響自應表立景來附廼虎
從羈制潛龍升天路備物立成器變通極其數百事以
時叙萬機有常度訓之以克讓納之以忠恕羣下仰清
風海外同懽慕象天則地化雲布昔日賢雕飾今尚儉
與素昔日多纖介今去情與故象天則地化雲布濟濟
大朝士夙夜綜萬機萬機無廢理明明降疇諮臣譬列
星景君配朝日輝事業並通濟功烈何巍巍五帝繼三
皇三皇世所歸聖德應期運天地不能違仰之彌已高
猶天不可階將復御龍氏鳳皇在庭棲

民晉書作人虎
作闕疇作訓

天命篇

聖祖受天命應期輔魏皇入則綜萬機出則征四方朝廷無遺理方表寧且康道隆舜臣堯積德踰大王孟度阻窮險造亂天一隅神兵出不意奉命致天誅赦善戮有罪元惡宗爲虛威風震勁蜀武烈懾彊吳諸葛不知命肆逆亂天常擁徒十餘萬數來寇邊疆我皇邁神武秉鉞鎮雍涼亮乃畏天威未戰先仆僵盈虛自然運時變固多難東征陵海表萬里梟賊淵受遺齊七政曹爽又滔天羣凶受誅殛百祿咸來臻黃華應福始王凌爲

禍先

難晉作艱秉作執賊淵作朝經凌作凌

景皇篇

景皇帝聰明命世生盛德參天地帝王道大創基旣已
難繼世亦未易外則夏侯玄內則張與李三亮稱逆亂
帝紀順天行誅窮其姦宄遏將御其漸潛謀不得起罪
人咸伏辜威風振萬里平衡綜萬機萬機無不理召陵
恒不君內外何紛紛衆小便成羣蒙昧恣心治亂不分
獻聖獨斷濟武常以文從天惟廢立掃霓披浮雲雲霓
旣已闢清和未幾閒羽檄首尾至變起東南藩儉欽爲
長蛇外則憑吳蠻萬國紛騷擾戚戚天下懼不安神武
御六軍我皇秉鉞征儉欽起壽春前鋒據項城出其不

意並縱奇兵奇兵誠難御廟勝實難支兩軍不期遇敵
退計無施虎騎惟武進大戰沙陽陂欽乃亡魂走奔虜
若雲披天恩赦有罪東土放鯨鯢外則晉書作外有稱書作構順作從邊作
遇虎作豹恩作因放作效

大晉篇

赫赫大晉於穆文皇蕩蕩巍巍道邁陶唐世稱三皇五
帝及今重其光九德克明文旣顯武又章恩弘六合兼
濟萬方內舉元凱朝政以綱外簡虎臣時惟鷹揚靡順
不懷逆命斯亾仁配春日威踰秋霜濟濟多士同茲蘭
芳唐虞至治四凶滔天致討儉欽罔不肅虔化感海外

海外來賓獻其聲樂並稱妾臣西蜀猾夏僭號方域命
將致討委國稽服吳人放命憑海阻江飛書告諭響應
來同先王建萬國九服爲蕃衛亾秦壞諸侯享祚不二
世歷代不能復忽踰五百歲我皇邁聖德應期創典制
分土五等蕃國正封界莘莘文武佐千秋邁嘉會洪業
溢區內仁風翔海外

虎晉書作武化感海外作
化感海內享作序業作澤

明君篇

明君御四海聽鑒盡物情顧望有譴罰竭忠身必榮蘭
茝出荒野萬里升紫庭茨草穢堂階掃截不得生能否
莫相蒙百官正其名恭已慎有爲有爲無不成闇君不

自信羣下執異端正直罹譖潤姦臣奪其權雖欲盡忠
誠結舌不敢言結舌亦何憚盡忠爲身患清流豈不潔
飛塵濁其源岐路令人迷未遠勝不還忠臣立君朝正
色不顧身邪正不並存譬若胡與秦秦胡有合時邪正
各異津忠臣遇明君乾乾惟日新羣目統在綱衆星拱
北辰設令遭閹主斥退爲凡民雖薄共時用白茅猶可
珍冰霜晝夜結蘭桂摧爲薪邪臣多端變用心何委曲
便僻從情指動隨君所欲偷安樂目前不問清與濁積
僞罔時主養交以持祿言行恒相違難饜甚谿谷昧死
射乾沒覺露則滅族

罹譖潤晉書作羅浸潤秦胡
作胡秦可珍作爲珍從作順

齊輦舞曲

明君辭

南齊書樂志曰漢章帝造輦舞歌云關東有賢女魏明帝代漢曲云明明

魏皇帝傳玄代魏曲作晉洪業篇云宣文創洪業盛德存泰始聖皇應靈符受命君四海今前四句錯綜其辭從五帝至不可啗六句全玄辭後二句本云將復御龍氏鳳皇在庭棲又改易焉

明君創洪業盛德在建元受命君四海聖皇應靈乾五
帝繼三皇三皇世所歸聖德應期運天地不能違仰之
彌已高猶天不可階將復結繩化靜拱天下齊

聖主曲辭

錯綜傳辭

聖主受天命應期則虞唐升旒綜萬機端宸馭八方盈

虛自然數揖讓歸聖明北化陵河塞南威越滄溟廣德
齊七政敷教騰三辰萬寓必承慶百福咸來臻聖皇應
福始昌德洞祐先

明君辭

首四句亦
綜傳辭

明君御四海摠鑒盡人靈仰成恩已洽竭忠身必榮聖
澤洞三靈德教被八鄉草木變柯葉川嶽洞嘉祥愉樂
盛明運舞蹈升太時微霜永昌命軌心長歡怡

梁鞞舞歌

隋書樂志曰梁三朝樂第十七設鞞舞唐書
樂志曰明君本漢世鞞舞曲梁武帝時改其
辭以歌

君德

沈約

大梁七百始天監三元初聖功澄宇縣帝德摠車書熙
熙億兆臣其志皆懽愉

刑措甫自今隆平亦肇茲神武超楚漢安用道邠岐百
拜奄來宅執玉咸在斯象天則地體無爲

禮緝民用擾樂諧風自移舜琴中已絕堯衣今復垂象
天則地體無爲

治兵戰六獸爲邦命九宮靈蛇及瑞羽分素復銜丹望
就踰軒頊鏗鏘掩咸護九尾擾成羣八象鳴相顧象天
則地化雲布

有爲臣所執司契君之道運行乃四時無言信蒼昊宸

居體沖寂。忘懷定天保。

至德同自然。裁成侔玄造。珍祥委天貺。靈物開地寶。窈窕降青琴。參差秀朱草。

右明之君

同前

周捨

赫矣明之君。我皇邁前古。機靈通日月。聖敬締區宇。淮海無橫波。文軌同一土。樂哉太平世。當歌復當舞。

右明之君

聖主應圖籙。天下咸所歸。端扆臨赤縣。宸居法紫微。遐方奉正朔。外戶闢重扉。我君延萬壽。福祚長巍巍。

右明主曲

明君班五瑞就日朝百王充庭植鷺羽鈞天奏清商本
支同中嶽良臣安四方盛明普日月兆民樂未央

右明君曲

鐸舞歌詩

唐書樂志曰鐸舞漢曲也古今樂錄曰鐸舞者所持也木鐸制法度以號令天下故取以爲名今謂漢世諸舞舞鞞巾二舞是漢事鐸拂二舞以象時

漢鐸舞曲

聖人制禮樂篇

古今樂錄曰古鐸舞曲有聖人制禮樂一篇聲辭雜

寫不復可辨相傳如此

古辭

昔皇文武邪彌彌舍善誰吾時吾行許帝道銜來治路
萬邪治路萬邪赫赫意黃運道吾治路萬邪善道明邪
金邪善道明邪金邪帝邪近帝武武邪邪聖皇八音偶
邪尊來聖皇八音及來義邪同邪烏及來義邪善草供
國吾咄等邪烏近帝邪武邪近帝武邪武邪應節合用
武邪尊邪應節合用酒期義邪同邪酒期義邪善草供
國吾咄等邪烏近帝邪武邪近帝武武邪邪下音足木
上爲鼓義邪應衆義邪樂邪邪延否已邪烏已禮祥咄
等邪烏素女有絕其聖烏烏武邪

晉鐸舞曲

傳玄

雲門篇

隋書樂志曰鐸舞傳玄代魏辭云振鐸鳴金是也古今樂錄曰魏曲

有太和時晉曲有雲門篇傳玄造以當魏曲齊因之梁周捨改其篇宋書載此亦不云玄作晉書樂志曰鐸舞詩二篇陳于元會

黃雲門唐咸池虞韶舞夏夏殷濩列代有五振鐸鳴金
延大武清歌發唱形爲主聲和八音協律呂身不虛動
手不徒舉應節合度周其叙時奏宮角雜之以徵羽下
矚衆目上從鐘鼓樂以移風與德禮相輔安有失其所

齊鐸舞歌

南齊書樂志曰鐸舞歌傳玄以代魏太和時徵羽除下厥衆目上從鐘鼓二句

黃雲門唐咸池虞韶舞夏夏殷濩列代有五振鐸鳴金

延大武清歌發唱形爲主聲和八音協律呂身不虛動
手不徒舉應節合度周期序時奏宮角雜之以徵羽樂
以移風禮相輔安有出其所

梁鐸舞曲

古今樂錄曰梁三朝
樂第十八設鐸舞

周捨

雲門且莫奏咸池且莫歌我后興至德樂頌發中和白
雲紛已隆萬舞鬱駢羅功成聖有作黃唐何足多

巾舞歌詩

漢巾舞歌詩

唐書樂志曰公莫舞晉宋謂之巾舞其說
云漢高祖與項籍會鴻門項莊舞劍將殺

高祖項伯亦舞以袖隔之且語莊云公莫
苦楚人相呼曰公言公莫害漢王也漢人
德之故舞用巾以像項伯衣袖之遺式宋
書樂志曰按琴操有公莫渡河其聲所從
來已久俗云項伯非也古今樂錄曰巾舞
古有歌辭訛異不可解江左以來有歌舞
辭沈約疑是公無渡河曲今三調中自有
公無渡河其聲哀切故入瑟調不容以瑟
調襍於舞曲惟公無渡
河古有歌有弦無舞也

古辭

吾不見公莫時吾何嬰公來嬰姥時吾哺聲何爲茂時
爲來嬰當恩吾明月之士轉起吾何嬰土來嬰轉去吾
哺聲何爲土轉南來嬰當去吾城上羊下食草吾何嬰
下來吾食草吾哺聲汝何三年針縮何來嬰吾亦老吾
平平門淫涕下吾何嬰何來嬰涕下吾哺聲昔結吾馬

客來嬰吾當行吾度四州洛四海吾何嬰海何來嬰四
海吾哺聲煬西馬頭香來嬰吾洛道五河五大度汲水
吾意邪哺誰當求兒母何意零邪錢健步哺誰當吾求
兒母何吾哺聲三針一發交時還弩心意何零意弩心
遙來嬰弩心哺聲復相頭巾意何零何邪相哺頭巾相
吾來嬰頭巾母何何吾復來推排意何零相哺推相來
嬰推非母何吾復車輪意何零子以邪相哺轉輪吾來
嬰轉母何吾使君去時意何零子以邪使君去時使來
嬰去時母何吾思君去時意何零子以邪思君去時思
來嬰吾去時母何何吾吾

宋書恩作思上作上海河
未嬰重一句五河作吾治

齊公莫舞辭

南齊書樂志曰晉公莫舞歌二十章章無定句前是第一解後是第十九二十解襍有三句並不可曉解建武初明帝奏樂至此曲言是似永明樂流涕憶世祖云

吾不見公莫時吾何嬰公來嬰姥時吾思君去時吾何
零子以邪思君去時思來嬰吾去時母那何去吾

此卽節前

古辭

古樂苑卷第二十九

西吳 梅鼎祚 補正

東越 呂胤昌 校閱

舞曲歌辭 雜舞

雜舞 二

拂舞歌詩

晉拂舞歌詩

晉書樂志曰拂舞出自江左舊云吳舞檢其歌非吳辭也亦陳于殿庭晉曲五篇一曰白鳩二曰濟濟三曰獨祿四曰碣石五曰淮南王齊多刪舊辭而因其曲名古今樂錄曰梁拂舞歌並用晉辭樂府解題曰曰除白鳩一曲餘並非吳歌未知所起

白鳩篇

南齊書樂志曰白符鳩舞出江南吳人所造其歌本云平平白符思

我君惠集我金堂言白者金行符合也鳩亦合也符鳩雖異其義是同晉書樂志曰晉楊泓舞序云自到江南見白符舞或言白鳥鳩舞云有此來數十年矣察其辭旨乃是吳人患孫皓虐政思屬晉也晉辭曰翩翩白鳩載飛載鳴懷我君德來集君庭蓋晉人改其本歌云

翩翩白鳩載飛載鳴懷我君德來集君庭白雀呈瑞素羽明鮮翔庭舞翼以應仁乾交交鳴鳩或丹或黃樂我君惠振羽來翔東壁餘光魚在江湖惠而不費敬我微軀策我良駟習我驅馳與君周旋樂道亾餘我心虛靜我志霑濡彈琴鼓瑟聊以自娛凌雲登臺浮遊太清扳

龍附鳳目望身輕

交交晉書作皎皎人餘晉書作忘飢目晉書作自宋書作目

濟濟篇

暢飛暢舞氣流芳追念三五大綺黃去失有時可行去
來同時此未央時冉冉近桑榆但當飲酒為歡娛衰老
逝有何期多憂耿耿內懷思淵池廣魚獨希願得黃浦
衆所依恩感人世無比悲歌且舞無極已

暢飛暢舞晉書作暢暢飛

舞同時晉書作時同有何期作何有期淵池廣作深地廣

獨漉篇

獨漉一作獨祿南齊書樂志曰古辭明君曲後云勇安樂無慈不問

清與濁清與無時濁邪交與獨祿伎錄曰求祿求祿清白不濁清白尚可貪汙殺我晉歌為鹿字古通用也疑是風刺之辭

獨漉獨漉水深泥濁泥濁尚可水深殺我雍雍雙鴈遊
戲田畔我欲射鴈念子孤散翩翩浮萍得風搖輕我心
何合與之同并空牀低帷誰知無人夜衣錦繡誰別僞
真刀鳴箭中倚牀無施父冤不報欲活何爲猛虎斑斑
遊戲山間虎欲齧人不避豪賢

碣石篇

南齊書樂志曰碣石魏武帝辭晉
以爲碣石舞其歌四章一曰觀滄

海二曰冬十月三日土不同四曰龜雖

壽樂府解題曰碣石篇晉樂奏魏武帝

辭首章言東臨碣石見滄海之廣日月

出入其中二章言農功畢而商賈往來

三章言鄉土不同人性各異四章言老

驥伏櫪志在千里烈士暮年壯心不已

也按相和大曲步出夏門

行亦有碣石篇與此並同

東臨碣石以觀滄海水何澹澹山島竦峙樹木叢生百
草豐茂秋風蕭瑟洪波湧起日月之行若出其中星漢
粲爛若出其裏幸甚至哉歌以詠志

右觀滄海

孟冬十月北風徘徊天氣肅清繁霜霏霏鷄鳴鴈
過南飛鷺鳥潛藏熊羆窟棲錢罇錢音書作耨停置農收積場逆旅
整設以通賈商幸甚至哉歌以詠志

錢音書作耨
罇一作罇

右冬十月

鄉土不同河朔隆寒流澌浮漂舟船行難雖不入地豐
賴深奧水竭不流水堅可蹈士隱者貧勇俠輕非心常

歎怨戚戚多悲幸甚至哉歌以詠志

右土不同

神龜雖壽猶有竟時騰蛇乘霧終爲土灰老驥伏櫪志在千里烈士暮年壯心不已盈縮之期不但在天養怡之福可得永年幸甚至哉歌以詠志

右龜雖壽

淮南王篇

崔豹古今注曰淮南王淮南小山之所作也淮南王服食求仙

遍禮方士遂與八公相攜俱去莫知所往小山之徒思戀不已乃作淮南王曲焉班固漢武帝故事曰淮南王安好神仙招方術之士能爲雲雨百姓傳云淮南王得天子壽無極帝心惡之使覲王云能致仙人與共遊處變化無常又能

隱形飛行服氣不食帝聞而喜欲受其道王不肯傳帝怒將誅焉王知之出令與羣臣因不知所之樂府解題曰古辭淮南王自言尊實言安仙去

淮南王自言尊百尺高樓與天連後園鑿井銀作牀金
瓶素綆汲寒漿汲寒漿飲少年少年窈窕何能賢揚聲
悲歌音絕天我欲渡河河無梁願化雙黃鵠還故鄉還
故鄉入故里裴徊故鄉苦身不已繁舞寄聲無不泰俳
徊桑梓遊天外

化晉書作寄聲作奇歌齊拂舞第五曲用之而刪其半

齊拂舞歌

白鳩辭

晉白鳩舞歌七解齊樂所奏是最前一解

翩翩白鳩再飛再鳴懷我君德來集君庭

濟濟辭

南齊書樂志曰晉濟濟舞歌六解齊樂所奏是最後一解按晉書樂

志是最前一解

疑齊書之誤

暢飛暢舞氣流芳追念三五大綺黃

獨祿辭

南齊書樂志曰晉獨漉歌六解齊樂所奏是最前一解

獨祿獨祿水深泥濁泥濁尚可水深殺我

碣石辭

南齊書樂志曰晉碣石舞歌四章齊樂所奏是前一章

東臨碣石以觀滄海水何淡淡山陽竦峙樹木叢生百

草豐茂秋風蕭瑟洪波涌起日月之行若出其中星漢

燦爛若出其裏幸甚至哉歌以言志

淮南王辭

南齊書樂志曰晉淮南王舞歌六解齊樂所奏前是第一解後

是第
五解

淮南王自言尊百尺高樓與天連我欲渡河河無梁願
作雙黃鵠還故鄉

梁拂舞歌

古今樂錄曰梁三朝樂第十九設拂舞
此歌刪晉白鳩篇而改曖曖鳴球一句

翩翩白鳩再飛再鳴懷吾君德來集君庭曖曖鳴球或
丹或黃樂我君恩振羽來翔

襍擬

臨碣石

沈約

碣石送返潮登岸禮朝日溟漲無端倪山島玄崇崿
老心未窮酬恩豈終畢

小臨海

劉孝威

碣石望山海，留連降尊極。秦帝枉鈎陳，漢家增禮秩。石橋終不成，桑田竟難測。蜃氣遠生樓，鮫人近潛織。空勞帝女填，詎動波神色。

淮南王

朱門以下玉臺別作一首

宋鮑照

淮南王好長生，服食鍊氣讀仙經。琉璃作椀牙作盤，金鼎玉七合神丹。合神丹，戲紫房，紫房綵女弄明璫。鸞歌鳳舞斷君腸，朱門九重門九閨。願逐明月入君懷，入君懷，結君佩，怨君恨。君恃君愛，築城思堅劒，思利同盛同。

哀莫相弃

朱門一作朱城

白紵舞歌詩

宋書樂志曰白紵舞按舞辭有巾袍之言紵本吳地所出宜是吳舞也晉俳歌云皎皎白緒節節爲雙吳音呼緒爲紵疑白緒卽白紵也南齊書樂志曰白紵歌周處風土記云吳黃龍中童謠云行白者君追汝句驪馬後孫權征公孫淵浮海乘舶舶白也今歌和聲猶云行白紵焉樂府解題曰古詞盛稱舞者之美宜及芳時爲樂其響白紵曰質如輕雲色如銀製以爲袍餘作巾袍以光軀巾拂塵唐書樂志曰梁武帝令沈約改其辭爲四時白紵歌今中原有白紵曲辭音與此全殊按引風土記童謠與此無謂

晉白紵舞歌詩三首

輕軀徐起何洋洋。高舉兩手白鵠翔。宛若龍轉乍低昂。凝停善睐容儀光。如推若引畱且行。隨世而變誠無方。

樂府 卷二十九 四言
舞以盡神安可忘。晉世方昌樂未央。質如輕雲色如銀。
愛之遺誰贈佳人。制以爲袍餘作巾。袍以充軀巾拂塵。
麗服在御會嘉賓。醪醴盈樽美且淳。清歌徐舞降祇神。
四座歡樂胡可陳。

雙袂齊舉鸞鳳翔。羅裙飄飄昭儀光。趨步生姿進流芳。
鳴弦清歌及三陽。人生世間如電過。樂時每少苦日多。
幸及良辰耀春華。齊倡獻舞趙女歌。羲和馳景逝不停。
春露未晞嚴霜零。百草凋索花落英。蟋蟀吟牖寒蟬鳴。
百年之命忽若傾。蚤知迅速秉燭行。東造扶桑遊紫庭。
西至崑崙戲曾城。

陽春白日風花香。趨步鳴玉舞瑤璫。聲發金石媚笙簧。
羅袿徐轉紅袖揚。清歌流響繞鳳梁。如矜若思凝且翔。
轉盼遺精豔輝光。將流將引雙雁行。歡來何晚意何長。
明君御世永歌昌。

宋白紵舞歌詩

宋書樂志曰白紵舞歌詩舊新合
三篇二篇與晉辭同其一稍互

高舉兩手白鵠翔。輕軀徐起何洋洋。凝停善睐容儀光。
宛若龍轉乍低昂。隨世而變誠無方。如推若引畱且行。
宋世方昌樂未央。舞以盡神安可忘。愛之遺誰贈佳人。
質如輕雲色如銀。袍以光軀巾拂塵。制以爲袍餘作巾。

四座歡樂胡可陳清歌徐舞降祇神

同前

南平王鑠

僊僊徐動何盈盈玉腕俱凝若雲行佳人舉袖耀青蛾
摻摻擢手映鮮羅狀似明月汎雲河體如輕風動流波

耀一作輝

同前

六首

鮑照

啓曰侍郎臣鮑照啓被教作白紵舞歌辭
謹竭庸陋裁爲四曲附啓上呈識方渙悻
思塗猥局言旣無雅聲未能文不足以宣
贊聖旨抽拔妙實謹遣簡餘慙隨悚盈謹
啓

吳刀楚製爲佩褱織羅霧縠垂羽衣含商咀徵歌露晞

珠履颯沓純袖飛淒風夏起素雲迴車怠馬煩客忘歸

蘭膏明燭承夜輝

履一作屣

桂宮柏寢擬天居朱爵文牕韜綺䟽象牀瑤席鎮犀渠

雕屏鈴匣組帳舒秦箏趙瑟挾笙竽垂璫散珮盈玉除

停觴不御欲誰須

鈴一作匣帳一作帷
珮一作綬御一作語

三星參差露沾濕弦悲管清月將入寒光蕭條候蟲急

荆王流歎楚妃泣紅顏難長時易戢凝華結藻久延立

非君之故豈安集

藻一作綵

池中赤鯉庖所捐琴高乘去騰上天命逢福世丁溢恩
簪金藉綺升曲筵思君厚德委如山潔誠洗志期暮年

烏白馬肉寧足言

騰一作飛命逢福世一作徵命逢福思君厚德一作恩厚德深

朱唇動素腕舉洛陽少童邯鄲女古稱淶水今白紵催
弦急管爲君舞窮秋九月荷葉黃北風驅鴈天雨霜夜

長酒多樂未央

腕一作袖童一作年

春風澹蕩俠思多天色淨綠氣妍和含桃紅萼蘭紫牙
朝日灼爍發園花卷幌結帷羅玉筵齊謳秦吹盧女弦

千金顧笑買芳年

蘭一作連

同前

二首

湯惠休

琴瑟未調心已悲任羅勝綺彊自持忍思一舞望所思
將轉未轉怕如疑桃花水上春風出舞袖逶迤鸞照日

徘徊鶴轉情豔逸君爲迎歌心如一

少年窈窕舞君前容華豔豔將欲然爲君嬌凝復遷延
流目送笑不敢言長袖拂面心自煎願君流光及盛年

齊白紵舞辭

五曲卽晉辭末首

王儉

陽春白日風花香趨步明月舞瑤裳

情發金石媚笙簧羅袿徐轉紅袖揚

清歌流響繞鳳梁如驚若思疑且翔

轉盼流精豔輝光將流將引雙鴈行

一作雙度行

歡來何晚意何長明君馭世永歌昌

梁白紵辭

古今樂錄曰梁三朝樂第二十設巾舞并白紵蓋巾舞以白紵四解送也

二首藝文作簡文帝今從玉臺

武帝

朱絲玉柱羅象筵飛琯促節舞少年短歌流目未肯前
含咲一轉私自憐

纖腰嫋嫋不任衣嬌怨獨立特爲誰赴曲君前未忍歸
上聲急調中心飛

同前 九首

張率

歌兒流唱聲欲清舞女趨節體自輕歌舞並妙會人情
依弦度曲婉盈盈揚蛾爲態誰目成

依一作調

妙聲屢唱輕體飛流津染面散芳菲俱動齊息不相違

令彼嘉客澹忘歸時久翫夜明星稀

日暮塞門望所思風吹庭樹月入帷涼陰旣滿草蟲悲
誰能離別長夜時流歎不寢淚如絲與君之別終何知

知一作如

秋風鳴條露垂葉空閨光盡坐愁妾獨向長夜淚承睫

山高水深路難涉望君光景何時接

鳴一作蕭獨向長夜一作獨問長安

遙夜方遠時旣寒秋風蕭瑟白露團佳期不待歲欲闌
念此遲暮獨無歡鳴弦流管增長歎

夜寒湛湛夜未央華燈空爛月懸光從風衣起發芬香
爲君起舞幸不忘

列坐華筵紛羽爵清曲未終月將落歌舞及時酒常酌
無令朝露坐銷鑠

愁來夜遲猶歎息撫枕思君終反仄金翠釵環稍不飾
霧縠流黃不能織但坐空閨思何極欲以短書寄飛翼
來一
作多

遙夜忘寐起長歎但望雲中雙飛翰明月入牖風吹幔
終夜悠悠坐申旦誰能知我心中亂終然有懷歲方晏

四時白紵歌

古今樂錄曰沈約云白紵五
章勅臣約造武帝造後兩句

春白紵

沈約
下同

蘭葉參差桃半紅
飛芳舞縠戲春風
如嬌如怨狀不同
含咲流盼滿堂中
翡翠羣飛飛不息
願在雲間長比翼
佩服瑤草駐容色
舜日堯年懽無極

夏白紵

英華作
梁武帝

朱光灼爍照佳人
含情送意遙相親
嫣然一轉亂心神
非子之故欲誰因
翡翠羣飛飛不息
願在雲間長比翼
佩服瑤草駐容色
舜日堯年懽無極

一一
作宛

秋白紵

白露欲凝草已黃
金瑄玉柱響洞房
雙心一意俱徊翔
吐情寄君君莫忘
翡翠羣飛飛不息
願在雲間長比翼

樂府 卷二十九
佩服瑤草駐容色舜日堯年懽無極

冬白紵

寒閨晝寢羅幌垂婉容麗色心相知雙去雙還誓不移
長袖拂面爲君施翡翠羣飛飛不息願在雲間長比翼
佩服瑤草駐容色舜日堯年歡無極

夜白紵

秦箏齊瑟燕趙女一朝得意心相許明月如規方襲予
夜長未央歌白紵翡翠羣飛飛不息願在雲間長比翼
佩服瑤草駐容色舜日堯年歡無極

隋四時白紵歌

東宮春

隋煬帝 下同

洛陽城邊朝日暉
天淵池前春燕歸
含露桃花開未飛
臨風楊柳自依依
小苑花紅洛水綠
清歌宛轉繁弦促
長袖逶迤動珠玉
千年萬歲陽春曲

江都夏

梅黃雨細麥秋輕
楓樹蕭蕭江水平
飛樓倚觀軒若驚
花簾羅幃當夏清
菱潭落日雙鳬舫
綠水紅粧兩搖漾
還似浮桑碧海上
誰肯空歌採蓮唱

梅黃一作黃梅
夏一作夜
誰一作詎

江都夏

虞茂 下同

長洲茂苑朝夕池
映日含風結細漪
坐當伏檻紅蓮披

樂苑 卷二十六
雕軒洞戶青蘋吹輕幌芳煙鬱金馥綺簷花簞桃李枝
蘭茗翡翠但相逐桂樹鴛鴦恒並宿

長安秋

露寒臺前曉露清昆明池水秋色明
搖環動珮出曾城
鵠弦鳳管奏新聲上林蒲桃合縹緲
甘泉奇樹尚葱青
玉人當歌理清曲
倏仔恩情斷還續

杯槃舞歌詩

宋書樂志曰槃舞漢曲也張衡舞賦云歷七
槃而縱躡王粲七釋云七槃陳於廣庭顏延
之云遞間闕於槃扇鮑照云七
槃起長袖皆以七槃爲舞也

晉杯槃舞歌詩

搜神記曰晉太康中天下爲晉世寧舞矜
手以接杯槃而反覆之此則漢世唯有祥
舞而晉加之以杯反覆也五行志曰其歌
云晉世寧舞杯槃言接杯槃於手上而反
覆之至危也杯槃者酒食之器也而名曰
晉世寧者言晉世之士偷苟於酒食之間
而其知不及遠晉世之寧猶杯槃之在手
也唐書樂志曰漢有槃舞晉世謂之杯槃
舞樂府詩云妍袖陵七
槃言舞用盤七枚也

晉世寧四海平普天安樂永大寧四海安天下歡樂治
興隆舞杯槃舞杯槃何翩翩舉坐翻覆壽萬年天與日
終與一左回右轉不相失箏笛悲酒舞疲心中慷慨可
健兒樽酒甘絲竹清願令諸君醉復醒醉復醒時合同
四坐歡樂皆言工絲竹音可不聽亦舞此槃左右輕自

相當合坐歡樂人命長人命長當結友千秋萬歲皆老
壽

齊世昌辭

南齊書樂志曰晉杯槃舞歌十解第三解
云舞杯槃何翩翩舉坐反覆壽萬年其第
一解首句云晉世寧宋改爲宋世寧惡其
杯槃翻覆辭不復取齊改爲齊世昌後一
解辭同唐書樂志曰梁謂之舞槃伎隋書
樂志曰梁三朝樂第二十一設舞槃伎

齊世昌四海安樂齊太平人命長當結友千秋萬歲皆
老壽

宋泰始歌舞曲辭

古今樂錄曰宋泰始歌舞十二曲一曰皇業
頌二曰聖祖頌三曰明君大雅四曰通國風

五曰天符頌六曰明德頌七曰帝圖頌八曰
龍躍大雅九曰淮祥風十曰末世大雅十一

曰治兵大雅十二
曰白紵篇大雅

皇業頌

此歌自堯至楚元
王高祖世載聖德

明帝

下同

皇業浚德建帝運資勳融胤唐重盛軌
胄楚載休風堯
帝兆深祥元王衍遐慶積善傳上業
胙福啓聖聖哀數
隨金祿登曆昌永命維宋垂光烈世美流舞咏

融一作
庸聖聖

一作
英聖

聖祖頌

聖祖維高德積勳代晉曆永建享鴻基萬古盛音冊
文纘宸馭廣運崇帝聲衍德被仁祉留化洽民靈孝建

緯孝業允協天人謀宇內齊政軌宙表燭威流鐘管騰
列聖彞銘賁重猷

明君大雅

虞龢

明君應乾數撥亂紐頽基民慶來蘇日國頌薰風詩天
步或暫艱列蕃翊迷慝廟勝敷九伐神謨洞七德文教
洗昏俗武誼清祲挺英勳冠帝則萬壽永齊天

齊宋書
作衍

通國風

明帝

下同

開寶業資賢昌謨明盛弼諧光烈武惟畧景王勳南康
華容變政文猛績爰著有左軍三王到氏文武贊丞相
作輔屬伊旦沈柳宗侯皆殄亂泰始開運超百王司徒

驃騎勲德康江安謨效殷誠彰劉沈承規功名揚慶歸

我后胙無疆

業宋書作國謨效作謀效

天符頌

天符革運世誕英皇在館神炫旣壯龍驤六鍾集表四
緯駢光於穆配天永休厥祥

明德頌

明德孚教幽符麗紀山鼎見奇體液涵祉鴈雛耀儀騶
虞遊趾福延億胙慶流萬祀

帝圖頌

帝圖凝遠瑞美昭宣濟流日鏡鹿毳霜鮮甘露降和花

雪表年孝德載行芳風永傳

龍躍大雅

豫章王

龍躍戎府玉耀蕃宮歲淹豫野璽屬嬪中江波澈映石
柏開文觀毓花蕊樓凝景雲白鳥三獲甘液再呈嘉穰
表沃連理協成德充動物道積通神宋業允大靈瑞方

臻

戎府宋書
作式符

淮祥風

北都尉

淮祥應賢彥生翼贊中興致太平

宋世大雅

虞龢

宋世寧在泰始醉酒歡飽德喜萬國朝上壽酒帝同天

惟長久

治兵大雅

明帝下同

王命治兵有征無戰巾拂以淨醜類革面玉儀振旅載
戢在辰中虛巾拂四表靜塵

白紵篇大雅

在心曰志發言詩聲成于文被管絲手舞足蹈欣泰時
移風易俗王化基琴角揮韻白雲舒簫韶協音神鳳來
拊擊和節詠在初章曲乍畢情有餘文同軌一道德行
國靖民和禮樂成四縣庭響美勳英八列陛唱貴人聲
舞飾麗華樂容工羅裳皎日袂隨風金翠列輝蕙麝豐

淑姿委體允帝衷

皎一作映
委一作秀

齊明王歌辭

齊明王歌辭七曲王融應司徒教而作也一
曰明王曲二曰聖君曲三曰淶水曲四曰採
菱曲五曰清楚引六
曰長歌引七曰散曲

王融

明王曲

一曲
二解

明王日月照至樂天地和幸息雲門吹復歇咸池歌桂
序金匏轉瑤軒絲石羅朱騏步躑躅玄鶴舞蹉跎露凝
嘉草秀煙度醴泉波皇基方萬祀齊民樂如何

序一
作房

聖君曲

一曲
三解

聖君應昌曆景祚啓休期龍樓神睿道鬼園仁義基海

蕩萬川集山崖百草滋盤苗成萃止渝隸異來思清明
動離軫威惠被殊辭大哉君爲后何美唐虞時

惠一作懷

淶水曲

一曲三解

湛露改寒司交鶯變春旭瓊樹落晨紅瑤塘水初淶日
霽沙渌明風泉動華燭遵渚汎蘭觴乘漪弄清曲斗酒
千金輕寸陰百年促何用盡歡娛王度式如玉

動一作暗弄一作

作無舞

採菱曲

一曲三解

炎光銷玉殿涼風吹鳳樓雕輜僚平隰朱櫂泊安流金
華粧翠羽鷁首畫飛舟荆姬採菱曲越女江南謳騰聲

翻葉靜發響合雲浮良時時一遇佳人難再求

雕輜一作青輅

飛一作龍
發一作散

清楚引

一曲
三解

平原數千里飛觀鬱岩岩清月罔將曙浩露零中宵轉
葉渡沙海別羽自冰遼四面涌寒色左右竟嚴飈崢嶸
多榛梗京索久塵苗逝將憑神武奮劒盪遺妖

涌一作通

長歌引

一曲
三解

周雅聽休明齊德覲升平紫煙四時合黃河萬里清翠
柳蔭通街朱闕臨高城方轂雷塵起接袖風雲生酣咲
爭日夕絲管牙逢迎徂年無促慮長歌有餘聲

牙疑作互

散曲

一曲
二解

金枝湛明燎繡幕裂芳然層閨橫綠綺曠席緬朱纒楚
調廣陵散瑟柱秋風弦輕裙中山麗長袖邯鄲妍徐歌
駐行景迅節籥浮煙言願聖明主永永萬斯年

散樂附

周禮曰旄人教舞散樂鄭康成云散樂野人
爲樂之善者若今黃門倡即漢書所謂黃門
名倡丙疆景武之屬是也漢有黃門鼓吹天
子所以宴羣臣然則雅樂之外又有宴私之
樂焉唐書樂志散樂者非部伍之聲俳優歌
舞雜奏秦漢已來又有雜伎其變非一名爲
百戲亦摠謂之散樂
自是歷代相承有之

俳歌辭

一曰侏儒導自古有之蓋倡優戲也
說文曰俳戲也穀梁曰魯定公會齊

侯于夾谷罷會齊人使優施舞於魯君之
幕下范甯云優俳施其名也樂記子夏對
魏文侯問曰新樂進俯退俯俳優侏儒優
侏子女王肅云俳優短人也則其所從來
亦遠矣南齊書樂志曰侏儒導舞人自歌
之古辭俳歌八曲前一篇二十二句今侏
儒所歌擿取之也古今樂錄梁三朝樂第
十六設俳伎伎兒以青布囊盛竹篋貯兩
蹠子負束寫地歌舞小兒二人提沓蹠子
頭讀俳云見俳不語言俳澀所俳作一起
四坐敬止馬無懸蹄牛無上齒駱駝無角
奮迅兩耳半折薦博四角恭時隋書樂志
曰魏晉故事有侏儒導引
古辭
隋文帝以非正典罷之

俳不言不語呼俳喻所俳適一起狼率不止生拔牛角
摩斷膚耳馬無懸蹄牛無上齒駱駝無角奮迅兩耳

宋鳳皇銜書伎辭

隋書樂志曰鳳皇銜書伎自宋齊已來有之
三朝用之南齊書樂志曰蓋魚龍之流也
元會日侍中於殿前跪取其書以授舍人
舍人受書升殿跪奏宋世有辭齊初詔江淹
改造至梁武帝普通中下詔罷之

大宋興隆膺靈符鳳鳥感和銜素書嘉樂之美通玄虛
惟新濟濟邁唐虞巍巍蕩蕩道有餘

齊鳳皇銜書伎辭

江淹

皇齊啓運從瑤璣靈鳳銜書集紫微和樂旣洽神所依
超商卷夏耀英輝永世壽昌聲華飛

古樂苑卷第二十九

終





